

# Conradin Klaiss en la direcziun da la Lia Rumantscha

■ **(LR) Conradin Klaiss (38) complete-scha a partir dal 1. da december 2014 la direcziun da la Lia Rumantscha (LR). El surpiglia da Conrad Cadonau il champ Furmaziun e vegn a manar las activitads da la LR en Surselva.** Ultra da sia incumbensa da manar il champ Furmaziun è Klaiss responsabel per la promoziun da la lingua e cultura rumantscha en Surselva. La lavur regiunala vegn sustegnida da *David Flepp* ed è domiciliada a Laax. A partir dal december completescha el plinavant la direcziun da la Lia Rumantscha.

*Conradin Klaiss* è manader da scola diplomà e scolast secundar. El ha instrui durant 12 onns ed ha manà durant trais onns la scola da Rueun cun 100 scolars e 15 persunas d'instrucziun. Dasperas è el comanader dals curs da rumantsch intensivs en Surselva. Per *Urs Cadruvi*, il secretari general da la Lia Rumantscha, èsi cler: «Cun Conradin Klaiss avain nus chattà ina persuna cun ina gronda savida en dumondas da furmaziun ed insatgi che sa senta da chasa, nua ch'i va per la promoziun da la lingua e cultura rumantscha. Conradin Klaiss dispona d'ina buna rait e numerus contacts en Surselva ed ha umor avunda per dumagnar quest pensum da Hercules.»

Conradin Klaiss è creschì si a Rueschein en in ambient rumantsch. Cun

sia lavur vul el rinforzar la conscienza da la populaziun per lingua e cultura.

«Las finamiras da la Lia Ruman-

tscha correspundan dal tuttafatg a las mias: las Rumantschas ed ils Rumantschs èn conscients dals avantatgs da lur lingua, dovran ella en il mintgadi

e la dattan vinavant a las proximas generaziuns. Jau hai plaschair da pudair m'engaschar per questa finamira en num da la Lia Rumantscha.»



Conradin Klaiss è il nov manader dal champ Furmaziun da la Lia Rumantscha.